

Siunnersuut: Inatsisartut inatsisissaattut nr. xx ulloq xx.xx 2016 Siusinaartumik pensionisiat pillugit Inatsisartut inatsisaat. (Aaqqiissutissaq § 31 inatsisip kalaallisut allassimanera)

(Isumaginninnermut, Ilaqutariinnermut, Naligiissitaanermut Inatsisinillu Atortitsinnermut Naalakkersuisumit saqqummiunneqartoq)

pillugu

siunnersuutip aappassaaneerreqarnissaanut

Inatsisinut Ataatsimiititaliap

ISUMALIUTISSIISUTAA

Ataatsimiititaliap kingullermik suliarinninnermini uku inuttarai:

Inatsisartunut ilaasortaq Laura Tàunâjik, Siumut, siulittaasoq
Inatsisartunut ilaasortaq Mala Høy Kuko, Atassut, siulittaasup tullia
Inatsisartunut ilaasortaq Jess Svane, Siumut
Inatsisartunut ilaasortaq Karl-Kristian Kruse, Siumut
Inatsisartunut ilaasortaq Debora Kleist, Inuit Ataqtatigiit
Inatsisartunut ilaasortaq Mimi Karlsen, Inuit Ataqtatigiit
Inatsisartunut ilaasortaq Kelly Berthelsen, Inuit Ataqtatigiit

Ataatsimiititaliap UKA 2016-imi ulloq 14. november 2016-imi siullermeerinninnerup kingorna siunnersuut sukumiinerusumik misissorpaa.

Siunnersuutip imarisaa siunertaalu

Siunnersuut siusinaartumik pensionisiat pillugit Inatsisartut inatsisaanni § 31-mut allannguutissatut siunnersuutaavoq. Siunnersuummik nassuiaatigineqartutut siusinaartumik pensionit pillugit Inatsisartut inatsisaanni § 31-p kalaallisuaa danskisuaalu imarisamikkut naapertuutinngitsut paasineqarpoq. Piumasaqaatit naammassineqarnerisa kingorna aammalu siusinaartumik pensionisianik qinnuteqaammik akuersissutaasumik kommunalbestyrelsip aalajangiinerata kingorna siusinaartumik pensionisiaqalersinnaatitaaneq qaammatip ulluisa aallaqqaataanni atuutilernissaa siunnersuummik siunertarineqarpoq. Inatsimmi atuuttumi isummanut paatsiveerussaataasumik naapertuutinnginnerit iluarsineqarnissaat allannguutissatut siunnersuummik siunertarineqarpoq.

Siunnersuutip Inatsisartuni siullermeerneqarnera

Naapertuutinngitsut Naalakkersuisunit kissaatigineqartut naapertorlugit iluarsineqarnissaat siunnersuummik siullermeerinermi tamakkiisumik tapersorsorneqarpoq, taamaakkaluartoq siunnersuut Ilaqutariinnermut Peqqissutsimullu Ataatsimiititaliami suliarineqartussanngorlugu innersuunneqarpoq, taamaaliornikkut inatsisip oqaasertaata inatsimmullu nassuiaatit oqaasertaliorneqarneri sukumiinerusumik suliaralugillu nalilivigineqarsinnaaniassammata.

Ataatsimiititaliap siunnersuummik suliaqarnera

Siunnersuut ilusimigut imarisamigullu naapertuutinngitsunik ulikkaarmat pingaartumik inatsisip suliarineqarnerani pitsaassutsip sapinngisamik annertunerpaamik qulakkeernissaata eqqumaffigilluinnarneqarnissaa pingaaruteqarmat ataatsimiititaliamit eqqumaffigeqquneqarpoq.

Naak inatsisip oqaasertaani naapertuutinnginnerit paasineqartut Naalakkersuisunit pilertortumik qisuariarfigineqarnerat iluarisimaarneqaraluartoq siusinaartumik pensionisiat pillugit Inatsisartut inatsisaata allanngortinneqarnissaanik siunnersuutip nassiuunneqartup pitsaassusianik qulakkeerinninnissamik piumasaqaat Naalakkersuisunit aammaarlugu eqquutsinneqarsimanngilaq.

Taamaakkaluartoq § 31-mi inatsisip oqaasertaasa kalaallisuuata danskisuuatalu imminnut oqaatsitigut imarisamiknullu naapertuuttoqannginnera paasineqarmat Naalakkersuisut piaartumik qisuariaateqarsimammata ataatsimiititaliamit nuannaarutigineqarpoq. Siunnersuummut nassuiaatini, tassungalu ilanngullugu ikaarsaariarnissamut aalajangersagassatut siunnersuutigineqartoq pillugu oqaatigineqartut ataatsimiititaliamit tusaatissatut tiguneqarput.

Oqaasertaliorneranut atatillugu ataatsimiititaliamit aallarniutigalugu oqaatigineqassaaq siunnersuutip qulequtaa Naalakkersuisullu allannguutissatut siunnersuutaata qulequtaa imminnut naapertuutinngimmata.

Inatsisissatut siunnersuutip qulequtaata kalaallisuuata suli kukkuneqarpoq, tamannalu kingusinnerpaamik siunnersuutip pingajussaaneerneqarnissaanut allannguutissatut siunnersuuteqarnikkut iluarsineqartariaqarpoq. Kalaallisuuata qulequtaani oqaaseqatigiit **“allanngortinneqarneranik”** mininneqarsimavoq, tamannalu aappassaaneerinissamut pingajussaaneerinissamulluunniit allannguutissatut siunnersuuteqarnikkut iluarsineqartariaqarpoq.

Aammattaaq siunnersuummi § 2, imm. 2-mi aamma kukkuneqartoq ataatsimiititaliamit oqaatigineqassaaq, tamatumani aalajangersakkap kalaallisuuata tamakkiisuunani. Oqaaseqatigiit matuma kingulianiittut siunnersuutigineqarsinnaapput:

Imm. 2. Piffissami ulloq 1. juli 2016-imiit Inatsisartut inatsisaata matuma atuutilersinneqarnerata tungaanut siusinaartumik pensionisiaqalernissamik qinnuteqarnermi, siusinaartumik pensionisiaqalernissamik pisinnaatitaaffeqalerneq pissaaq, qinnuteqarnermiit piumasaaqatillu naammassineqarnerannit qaammatip tulliata aallartinnerani.

Tamatuma saniatigut siunnersuummi § 1-imi oqaaseqatigiit “siusinaartumik pensionisiaqalernissamik pisinnaatitaaffeqalerneq pissaaq” eqaannerusumik oqaasertaliorneqarsinnaagaluarpoq imaalillugu “siusinaartumik pensionisiaqarsinnaatitaasoqalersarpoq”

Tamatuma saniatigut siunnersuummut nassuiaatini oqaatsitigut kukkuneqartoq ataatsimiititaliamit oqaatigineqassaaq.

Tassa ataatsimiititaliamit aamma maluginiarneqarmat § 31-imut tunngatillugu inatsisissatut siunnersuutip oqaasertallu atuuttut sanileriissillugit takussutissiarineqarneranni kalaallisut oqaasertaliorneqarnerat kukkuneqartoq. Inatsimmi oqaasertat atuuttut oqaasertaliorneqarneri siunnersuummilu nutaami oqaasertat ersarilluinnartuusariaqarput. Nammineq oqaasertalersuineq oqaatsitigut paatsiveerunnerulersitsisoqaannartarpoq.

Ataatsimut isigalugu maluginiaqquneqarpoq kalaallisuuani nassuiaatit oqaasertaliornerillu oqaatsitigut kukkunernik ulikkaarmata isummanik isumaarutsitsisunik.

Inatsimmut nassuiaatit allannguutissatut siunnersuuteqarnikkut iluarsineqarsinnaanngillat, pissutsilli ataatsimiititaliamit maanna erseqqissarneqarput. Inatsisip oqaasertaasa inaarutaasumik oqaasiliorneqarneri nassuiaatini oqaatsinit atorineqartunit salliullutik aalajangiisuussapput.

Siunnersuut pillugu Isumaginninnermut, Ilaqutariinnermut, Naligiissitaanermut Inatsisinillu Atortitsinnermut Naalakkersuisumit saaffiginnissut ataatsimiititaliamit ulloq 15. november 2016-imi tiguneqarpoq. Siunnersuummut nassuiaatit kalaallisoortaanni sanilliussinerup kukkuneqarneranut saaffiginnissut tunngassuteqarpoq, tamanna ataatsimiititaliamit aamma eqqumaffigineqarpoq isumaliutissiisummilu matumani sammineqarluni.

Isumaginninnermut, Ilaqutariinnermut, Naligiissitaanermut Inatsisinillu Atortitsinnermut Naalakkersuisup saaffiginnissutaata 15. november 2016-imeersup assiliorneqarnera isumaliutissiisummut matumunnga **ilannugsaq 1**-itut ilanngunneqarpoq.

Siunnersuutip aningaasaqarnikkut kingunerisassai

Siunnersuutip aningaasatigut kingunerisassaatur oqaatigineqartut ataatsimiititaliamit tusaatissatut tiguneqarput.

Ataatsimiititaliap inassuteqaatai

Tamanna tunngavigalugu ataatsimiititaliap siuliani taaneqartutut kissaatigisaanut naapertuuttumik Naalakkersuisut allannguutissatut siunnersuummik saqqummiussereerpata siunnersuut Inatsisartunit akuerineqassasoq ataatsimiititaliamit inassutigineqassaaq.

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappasaaniigassanngortippaa.

Laura Tàunâjik
Siulittaasoq

Mala Høy Kuko

Jess Svane

Karl-Kristian Kruse

Debora Kleist

Mimi Karlsen

Kelly Berthelsen